



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

#### 14. Kalenderwoche – ab 4. April 2010

Eine tragische Geschichte der Chemnitzer Stadtentwicklung greift Sachsenmeyer diesmal auf. Der Chemnitzer Brühl fristet seit der Wende einen Dornröschenschlaf. Alle Bemühungen, das zentral gelegene Viertel wiederzubeleben schlugen bisher fehl.

## Dor Briehl

Nee, isch bin kee Denkmalschidzor odor sowas... Isch du ehor ma selbor denkn! Un da denk isch immor - was marode is, muss weg!

Wenns da nach meinor Gudstn gehn däde... die had da so e weesches Härze! - da häddn mir de aldn Mehbl von vor dor Wände noch ohm offm Bodn rumschdehn. Un die von dor Schwieschormuddor dädn dähn Kellor bloggiern. Die kann sisch so schwähr von was drenn, meine Gudste! Naja, sonsd hädde se misch villeischd ooch schon längsd offn Mond geschossn! So gesähn, had de Anhänglichkeed nadiehrlich durschaus eene bosediefe Seide!

Nee, abor sonsd... mor kann nisch alles offhehm! Da wär de Weld e Gerimblachor! Ooch Beeme! Wenn se nisch mähr gesund sinn, missn se umgehaun wern, bevor se womeeschlich von alleene umfalln dun. Das is ja dann ooch sähr gefährlich! Na, wennsde so eene hunnordjährige Eische offn Kobb grischn dusd... da kannsde Dir eene Bfeife anbrenn, wenn de noch kannsd!

Nee, was duds denne nidzn, wenn da was vor sich hingammln dud un womeeschlich Schimmlbilze broduzierd, un keenor brauchds noch?

Un wo isch nu vorsche Woche ma widdor offm Briehl war, habsch ooch so gedachd - weg damid! Off dor annorn Seide hads misch allordings ooch e bißl draurisch geschdimmd. Naja, das eene dud ja das annre nisch ausschließn - wemmor aus Vornunfdgrinde was vornischdn dun dud, kammor ja drozdähm daderdriebor draurisch sein, dass da ehm was is, was zu nischd mähr nidze is!

Ja, un wozu is dor Briehl noch nidze? Villeischn fiehr irschendwelsche Osdalgigor, die dord rumschbaziern kenndn... un sisch in de aldn Zeidn zuriggdräum dun kenndn...?

Wennde nisch dräum dusd, da siehde - dor Briehl is dod! Also, so gud wie!

Gud, meine Zahnärzdin häld dord noch de Schdellung. Desvorweeschn komm isch ja eema im Jahr hin - offn Briehl. Weeschn de Zähne! Beziehungsweise - weeschn die Zähne, die nisch mähr da sinn! Un weeschn Bonushefd!

Un gleich vorne is noch das Hodel "Sächsischor Hof", das sisch irschendwie mid Lisd un Digge da haldn dud. Un noch zwee drei Lädn off dähm ganzn Schdigge bis hinnor zum Zöllnorblad. Nee, e Jammor, wennde da langloofn dusd! Un alles vollgeschmierd mid Farbe! De Heisor un ooch de Kunsdwerge. Besondorsch hamms de Schmierfinkn... odor bessor, die Sudlsäue - off dähn Bahries un de Göddinnen abgesähn. Wie die immor aussähn dun! Jeds Jahr annersch bund.

Un dann scheid offm Briehl noch e großer Hund zu wohn, dähr sugsessiefe alles zuscheißn dud. Un ob das nu werglisch eene gude Idee is, dähn Briehl als Hundeglo...?

Nee, da bin isch ehm eenor dähr sachd - weg damid! Ooch wenns schmärzn dud. Da is nischd zu reddn! Odor es missde jemand sähr viel Geld ibrisch ham! Das Rehrsdorf-Zendor abreißen un alle Geschäfte missn offn Briehl! Da däde dann... naja, abor das is nadiehrlich bure Udobie!

**Eduard Sachsenmeyer**